

# القيادة طيب ساس وطيب راس ومنهجية

يا وطن مكة وطيبة ما تجي فيك المآسي  
وأنت تحكم من كتاب الله ومن سنة نبيه  
ما تدار بعلمنة ولا غلو منهجك أساسي  
فيك منهج أمة وسطى لها أعظم مرجعيه  
ما نخاف وفيك بيت الله ولك قائد سياسي  
والله الحافظ وسنتنا من التايه بريه  
أمرنا شوري بلا حزب وبلا لعبة كراسي  
شاور القائد بأمره وأن عزم ربه وليه  
المليك اللي على حكمك على الشدات راسي  
حافظك حفظه لروحه صاينك عن كل نيه  
ولا يجي في عين عبد الله ولو نمنا نعاسي  
ما ينام وفيك مظلوم بلا ذنب وخطيه  
وعن حدودك يا وطن سلطان متنبه وقاسي  
الكريم اللي على الأيتام له نفس رضيه  
لك مبادئك العظيمة ثابتة مثل الرواسي  
في ثباته كنها ذيك الجبال العارضية  
من يحاول زعزعة أمنك ترى حقه يدا سي  
لجل تعرف قيمته وأيضاً لأجل تردع بقيه  
عافهم حتى ترابك خاسي يسند لغاسي  
شوف شعبك كلهم صاروا وزارة داخلية  
نايف النايف بأمنك لا خلل ولا إنتكاسي  
واهني من يزبنه وقت الشدايد واهنيه  
ضاعف الجهد ورجاله في زمن معلن قياسي  
بينوا وجه الجناه وحاصروا أكبر خليه  
ويا الرياض أم المدائن فيك سلمان متواسي  
يردع الظالم عن المظلوم عدل ومنهجيه  
يا بلاد الخير والأخيار ما فيك إلتباسي  
الله اللي سلمك بيد الدهاة العبقرية  
ما فرح بالشرف فيك إلا مسافيه نجاسي  
ما علينا لو هذر عازر ولو يهذر خويه  
قادنا راس العرب للرقم الأول والقياسي  
والقيادة طيب ساس وطيب راس ومنهجيه

الشاعر /

جميعان بن عبدالله الشاهري

